

– Չեմ կարող ասել, մի՞ հարցրու: Հայրս պատուիրել է, որ ոչ մի մարդու չասեմ:

– Ին՞ձ էլ:

– Քեզ էլ:

Ես տեսայ, որ անկարելի էր Մարօից խօսք դուրս քաշել այս գաղտնիքի մասին, որովհետեւ Մարօն միամիտ աղջիկներից չէր: Եւ հարցրի.

– Ինչո՞ւ հայրդ պահում է իր մօտ մի այսպիսի մարդասպանին:

– Նրա համար, որ նա մարդասպան է:

– Լա՞ւ է մարդ սպանելը:

– Վատ մարդուն, ի հարկէ:

– Ուրեմն դու ինչո՞ւ Մըհէի վրայ բարկանում ես:

– Նրա համար, որ նա սպանեց շանը:

– Շունը մարդից լաւ՞ է:

– Շատ մարդերից, որոնք վատ են, ինչպէս քրդերը: Շունը մեր տունը պահում էր: Բայց քրդերը մեր տունը քանդում են:

«Իսկ եւ իսկ իր հօր կտորն է»... ասեցի ես իմ մտքում:

– Գիտես, Ֆարիատ, որքա՛ն գող են քրդերը. նրանց երեխաներն էլ գող են. հենց որ օրօրոցից դուրս են թռչում, գողութիւն են անում: Անցեալ տարի մեր հաւերի ճուտերից ամէն օր մէկը պակասում էր, էնպէս որ տասներկու ճուտից մնաց երեքը: Ո՞վ է տանում, տէր աստուած: Հայրս ասում էր՝ քօրքօրան (ուրուրդ) է տանում: Մըհէն ասում էր՝ աղոտն է գողանում: Ես բակի բուրբուկները բռնեցի, որ աղոտը ներս չմտնի. մի ծակ միայն բաց թողի, որ գալու ժամանակ բռնեմ նրան: Գիշերը նստում եմ, մտիկ եմ անում, մտիկ եմ անում, աղոտը չկայ: Յերեկով մտիկ եմ անում, ագռան էլ չէ թռչում մեր կտուրի վրայով: Բա՛՛ր ո՞վ է տանում ճուտերը: Մի օր տեսնեմ, մեր հարեւան քրդի աղջիկը, Գիւլին, մեր տան դռնիցը անց կացաւ, մտաւ մարագը, կանչեց՝ ճո՛ւ, ճո՛ւ: Ճուտերը նրա ձայնին սովորած էին, իսկոյն դուրս վազեցին: Նա կուտ գցելով, ճուտերին հեռացրուց, տարաւ մինչեւ մեր տան մօտի խրամը, իջաւ փոսի մէջ: Ի՞նչ սատանայ է: Ես վրայ հասայ, տեսնեմ ճուտերից մէկը բռնել է, ուզում է տանել: «տօ, սատկած Գիւլի, ո՞ւր ես տանում մեր ճուտը», ասում եմ ես ու բռնում նրա ծամերից: Նա մատները գցեց, ուզում էր իմ երեսը ճանկատել: Ես բռնեցի բողազից (շնչափողից), դրի տակս, խեղդում եմ, խեղդում, մինչեւ աչքերը դուրս թան: Ափսո՛ս, որ Հասօն եկաւ, ձեռքիցս առեց: